

fail: adat8

PANTUN-PANTUN DI HULU MUAR

Pantun Yang Sering Dituturkan Dalam Majlis Tertentu

Tok,
Tangga sudah sahaya tenggek
Lantai sudah sahaya pijak
Tikar sudah sahaya duduk

Batang rumbia berbelah-belah
Yang sebelah dimakan api
Datang sahaya tidak pernah
Datang sahaya berkehendak hati.

Keduduk di atas tikar
Uratnya silih menyilih
Duduklah dato' di atas tikar
Sahaya hendak memberi sirih

Keduduk di atas tikar
Mempelas atas tundis
Duduklah Tok atas tikar
Sahaya hendak membalas menyirih

Limau purut jatuh ke lembah
Tiba ke lembah tumbuh duri
Pinang menghadap, sirih menyembah
Jari sepuluh menjunjung duli

Makan sirih berpinang tidak
Pinang ada dari Melaka
Makan sirih mengenyang tidak
Sebab budi dengan bahasa

Anak kambing Lindam Dewi
Makan kulit medang bulu
Sirih sahaya sirih puteri
Yang mana diambil dulu?

Pergi ke dusun berbilang
Menebang medang bulu
Kata hukum, kita ber-Allah
Pinang dimakan dahulu

Teluk tanjung berbelah-belah
Sebelah sebesar pinggan
Telunjuk diberi Allah
Akan pencolek kapur jintan.

Telatuk dibelah-belah
Dibelah di atas manggis
Telunjuk diberi Allah
Buat pencolek jari manis

Keduduk di atas tikar
Uratnya dari Melaka
Duduk kita atas tikar
Hendak membilang adat pesaka

Keduduk di dalam kualiti
Uratnya sampai Melaka
Duduk kita dalam negeri
Elok membilang adat pesaka

Pinang sahaya pinang jujutan
Patah tampuk akan bertelaga
Ilmu sahaya ilmu tuntutan
Awan bertepuk, gunung berlaga

Cendawan sebesar payung
Habis sebelah dimakan api
Sapulah awan, sapulah gunung
Sama merendam di dalam hati

Keduduk di dalam dulang
Urat berjalur-jaluran
Duduk kita duduk berbilang
Adat yang mana kita keluarkan

Pahat pisak laman gedang
Pahat rumah Bilal Lata
Makan sirih sekapur seorang
Itulah mula asal kata

Bukan lebah sebarang lebah
Lebah bersarang di buku buluh
Bukan sembah sebarang sembah
Sembah bersusun jari sepuluh.

(Dikutip dari 'Papers on Malay Subjects' - J E Nathan & R O Winsted)